

La Lettre Jèrriaise pour Sanm'di lé 14 du mais d'September 2024.

Bouônjour tout l'monde. Ch'est Françouais L' Maistre tch'a l'pliaîsi dé vouos présenter la Lettre Jèrriaise aniet, Sanm'di lé 14 du mais d' September 2024.

À la fin d'la s'maine pâssée, j'eus la chance d'aller à St. Malo auve ma vouaituthe pour pâsser deux'-trais jours à St. Hilaire du Harcouët, tch'est la ville en Nouormandie jeunm'lée auve St. Pierre, ichîn en Jèrri. La mé 'tait comme eune plianche, et ch'tait eune supèrbe traversée. Souvent quand j'arrive en France sus l'heuthe du dîner, j'aime bein aver man dîner à l'Hôtel dé Brétangne à Dol. Et, autant j'lé fis. Comme d'habitude, j'eus un bouan r'pas, du païsson pour les deux pliats, pa'ce qu'i spécialisent auve lé païsson. Et pis, en route pour St. Hilaire.

J'fus à l'Hôtel Lé Lion d'Or pour laïssi mes bagages et pis, à la Mairie pour tchéchi qué tout fûsse bein pour lé lendemain. M'èrvélà rentré à l'Hôtel et à sept heutthes, mé v'la à rencontrer la danme, Irène Saladîn, et j'dînînmes ensembl'ye. Irène et s'n homme, Jean-Pierre, avaient souongni d'mé pour bein d's années duthant nous visites, mais jé n'peux pus ramonter lus montée !

Lé préchain jour, auprès l'dêjeuner, m'èrvéla hors à St. Malo eune aut' fais pour ramâsser deux dé nous membres du baté. Ch'tait d'la plyie avèrse pour à bein prêt vîngt minnutes, et pis, lé temps s'clièrgit et j'eus bouonne route jusqu'à St. Malo. Hélas, m'luque !! Lé baté 'tait èrtèrgi dé pus d'eune heuthe !! J'avions arrangi dé rencontrer deux'-trais dé nous anmîns pour lé dîner à St. Hilaire dans les eune heuthe et d'mie, ch'est pouortchi, i' fallait annuler tout ch'na! Ch'tait d'sappointant! Enfn, quand ils arrivîtent, j'décidînmes d'aller dîner à St. Sèrvan, dans un p'tit restaurant en fache d'la riviéthe. Et, l'solé s'déhalit. Ch'tait mangnifique à cachi jusqu'à la Nouormandie, mais nous èrvéla dans d'la plyie avèrse eune aut' fais. La Météo nous avait prédit un tas d'plyie et i' 'taient correctes ! Enfn, j'arrivînmes en temps pour rencontrer des membres du Jeunmélage dé St. Hilaire sus lus Halle au « Forum » des Associâtions d' la ville. Heutheûsement, les halles sont à l'abri dans lé Marchi. Lus Président 'tait là étout et j'eûnmes eune bouonne conversâtion. À cause dé Covid, j'n' avais pon rencontré les membres pour tchiques années, et j'tais bein content d'les vaie. Et pis, la boutiqu'sie siez Leclerc, dévânt èrtouônner à l'Hôtel. J'aime bein boutitchi en France, pa'ce qué les prix pour certaines litcheurs dans lus supèrmarchièrs sont bein miyeu marchi qué siez nous.

Lé sé, j'avions arrangi pour rencontrer nous anmîns, les jeunmieaux, pour un r'pas à l'Hôtel et un tas d'caqu'téthie !! Nouot' Connétabl'ye, lé Sieur Richard Vibert, et lé Chef dé Police, lé Sieur Jean Camara, et nouot' Président, la danme Claire dé Gruchy, 'taient tous là. Lé Maire Adjoint, lé Sieur Jean-Luc Garnier 'tait là étout auve deux des Vièrs Présidents du Jeunmelage, Jean-Louis Rivière et Irène Saladîn et lé Directeu dé l'École Primaithe dé Beauséjour, Erwan Saladîn. Les p'tchiots dé lus école ont visité les p'tchiots dé l'école dé St. Pierre lé temps pâssé.

Ch'tait eune raide bouonne séthée, du bouan mangi et du vîn étout ! À la fin d'la séthée, Lé Connétabl'ye présentit la couleu d'St. Pierre au Maire Adjoint, pa'ce qué la vieille couleu avait 'tait détruite dans les dgêles du mais d'Novembre d'l'année pâssée. Jean-Luc 'tait surprîns et bein èrconnaîssant d'la part dé la Ville dé St. Hilaire.

Lé préchain jour, j'décidînmes d'èrtouônner à St. Malo en bouan temps, pa'ce qu'i' 'taient à prédithe d'la forte plyie et d's înnondâtions pour la Manche. J'feûmes chanceurs car j'eûnmes d'la plyie seulement quand j'arrivînmes à St. Malo. Et d'la plyie tout l'long d'la traversée d'èrtou. Av'-ous janmais 'té auve les Jeunmieaux pour visiter les villes jeunm'lées auve Jèrri ? Ch'est eune bouonne et belle expéthience et un tas d'fanne! N'en v'la assez pour aniet.

Ayiz eune bouonne sémaine.

À bi.